

Sachchā Maqdis



sachchā maqdis

The True Temple

by Bakhtullah

[*Ao, Khud Dekh Lo 5*]

(Urdu—Roman script)

© 2023 www.chashmamedia.org

published and printed by

Good Word, New Delhi

The title cover is a collage of

Chakkree-Chantakad <https://pixabay.com/images/id-4821585/>

OpenClipart-Vectors <https://pixabay.com/images/id-1300109/>

aalmeidah <https://pixabay.com/images/id-3589838/>

R. Gunter <https://freebibleimages.org/illustrations/rg-king-jesus/>

J. Kemp/R. Gunter

<https://freebibleimages.org/illustrations/lp-peter-lame-man/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Lele ke K̄hūn se Najāt	1
Maqdis meñ Mandī	2
Maqdis: Pāk Maqām	3
Maqdis: K̄hudā ke Huzūr Āne kā Maqām	4
Maqdis: Bāp kā Maqām	4
Masīh Sachchī Parastish Qāym Karegā	5
Apnī Ġhalatī ke lie Andhe	6
Insān Maqdis ko Pāk Nahīn Rakh Saktā	7
Masīh hī Sachchā Maqdis aur Lelā Hai	8
Injīl, Yūhannā 2:13-22	10

Fasah kī Īd qarīb ā gai. Yih ek bahut ahm īd thī.

► *Is īd par Yahūdī kyā manāte the?*

Yih ki Ḳhudā ne Isrāīliyon ko Misr kī ḡhulāmī se chhuṛāyā.

Us waqt Ḳhudā ne farmāyā thā ki Isrāīlī ek lele kā ḡhūn darwāze ke chaukhaṭon par lagāen. Jis ne aisā kiyā us ke sab ghar wāle zindā rahe. Jis ne aisā na kiyā uskā pahlaūṭhā mar gayā. Rāt ke waqt Misriyon meñ baṛā hallā mach gayā, kyonki jail ke qaidī se lekar Firaun tak un ke tamām pahlaūṭhe mar gae the. Tab Misr kā bādshāh Isrāīliyon ko chhoṛne par majbūr huā.

Lele ke Ḳhūn se Najāt

Ek lele ke ḡhūn ne unheñ Ḳhudā ke ḡhazab se bachāyā.

Ek lelā najāt kā bāis ban gayā.

Yih lelā sirf Yarūshalam ke maqdis meñ zabah kiyā jā saktā thā. Is mauqe par Ẹhudāwand Īsā apne shāgirdoñ ke sāth Yarūshalam pahuñch gayā.

► *Jāne kā kyā maqsad thā? Wuh wahāñ kyā sikhānā chāhtā thā?*

Maqdis meñ Mandī

Jab wuh Baitul-muqaddas pahuñche to kyā dekhte haiñ, bairūnī sahn meñ baṛī mandī lagī huī hai. Us meñ lātādād gāy-bail, bheṛeñ aur kabūtar bik rahe haiñ. Ek taraf mezoñ kī qatār lagī huī hai. Wahāñ sarrāf baiṭhe ām sikke ḳhās sikkoñ meñ badal rahe haiñ. Māmūl ke sikke manā the, islie jo ātā thā use apne sikke in ḳhās sikkoñ meñ badalnā thā.

Har taraf ḍakārte gāy-bail, mimiyātī bheṛ-bakriyāñ, ḡhūñ ḡhūñ karte kabūtar, mol-tol meñ lage saudāgaroñ kī chīḳh-pukār.

Yih kuchh dekhte hī Ẹhudāwand Īsā āpe se bāhar huā. Wuh rassiyoñ kā koṛā banākar sab par ṭuṭ parā. Us ne bheṛoñ aur gāy-bailoñ ko bāhar hāñk diyā, paise badalne wāloñ ke sikke bikher die

aur un kī mezeñ ulaṭ dīñ. Kabūtar bechne wāloñ ko us ne kahā, “Ise le jāo. Mere Bāp ke ghar ko mañḍī meñ mat badlo.”

Maqdis: Pāk Maqām

► *Wuh kyon itne ḡhusse huā?*

Baitul-muqaddas wuh muqaddas jagah thā jahāñ insān Ḳhudā ke huzūr ākar uskī parastish kar saktā thā. Us Ḳhudā kī jo na sirf azīm hai balki jo pāk bhī hai. Jis ke sāmne gunāhgār insān qāym nahīñ rah saktā. Use mañḍī meñ badalnā saḡht gunāh thā.

Is duniyā meñ har taraf dīñī mañḍiyāñ lagī rahtī haiñ. Jahāñ log pūjā aur parastish karte haiñ wahāñ paise kamānā āsāñ hai. Jo ām bāzār meñ paisā gin ginkar saudā mol letā hai wuh dīn ke māmaloñ meñ andhā-dhund detā hai.

► *Kyon?*

Zāhir hai, kaun apne dewtā yā Ḳhudā ko nārāz karnā chāhtā hai? Is binā par mazhab ko peshā banā diyā gayā hai.

Maqdis: ẖhudā ke Huzūr Āne kā Maqām

Yahān ẖhudāwand Īsā ne na Baitul-muqaddas kahā na maqdis.

► *Us ne kyā kahā?*

Mere Bāp kā ghar.

► *Kyā ẖhudā wahān bastā thā?*

Nahīn. Jis ne sab kuchh ẖhalaq kiyā wuh na Baitul-muqaddas na kisī aur jagah rahtā hai. Magar yih ghar uskā nishān thā, wuh maqām jis se zāhir hotā thā ki wuh apnī qaum ke sāth hai. Jahān us ke imām use qurbāniyān pesh karte the. Islie imāndār baṛī idon par jahān mumkin thā wahān āyā karte the.

Maqdis: Bāp kā Maqām

► *Mere Bāp kā ghar. Mere Bāp kahkar wuh kyā kahnā chāhtā hai?*

Merā ẖhudā Bāp se ẖhās rishtā hai, Farzand kā pāk rishtā.

Yahī wajah hai ki wuh itne ḡhusse huā.

Bāp kā ghar merā ghar bhī hai. Aur isī ko tum ne maṇḍī meṅ badal ḍālā hai. Parastish aur duā kī jagah mol-tol kī maṇḍī ban gaī hai. Ḳhudā iskā markaz nahīn rahā. Uskī tauhīn ho rahī hai.

Masīh Sachchī Parastish Qāym Karegā

Nabiyoṅ ne bār bār is tauhīn kā zikr kiyā thā. Yoṅ Yarmiyāh Nabī ne farmāyā thā,

Kyā tumhāre nazdik yih makān jis par mere hī nām kā ṭhappā lagā hai ḍākuoṅ kā aḍḍā ban gayā hai? Ḳhabrdār! Yih sab kuchh mujhe bhī nazar ātā hai. (Yarmiyāh 7:11)

Nabiyoṅ ne is se baṛhkar sāf batāyā thā ki insān apnī koshishoṅ se sachchī parastish kar hī nahīn saktā. Islie ek waqt āegā jab Ḳhudā Ḳhud, al-Masīh ke zariye yih sachchī parastish qāym karegā. Yoṅ Zakariyāh Nabī sadiyoṅ pahle peshgoī kartā hai ki us waqt saudābāzī ḳhatm ho jāegī.

Us din se Rabbul-afwāj ke ghar meñ
koī bhī saudāgar pāyā nahīn jāegā.
(Zakariyāh 14:21)

Yasāyāh Nabī ne bhī is Masīhānā zamāne kī
peshgoī kī thī,

Merā ghar tamām qaumoñ ke lie duā
kā ghar kahlāegā. (Yasāyāh 56:7)

Ġharz, Ḳhudāwand Īsā apne amal aur kalām se
zāhir kar rahā hai ki wuh al-Masīh hai jo sachchī
parastish kā yih zamānā shurū karne āyā hai.

Apnī Ġhalatī ke lie Andhe

► *Dūsre log yih dekhkar kyā karte haiñ?*

Wuh pūchhte haiñ ki “Āp hameñ kyā ilāhī nishān
dikhā sakte haiñ tāki hameñ yaqīn āe ki āpko yih
karne kā iḳhtiyār hai?”

► *Kyā āpne kuchh mahsūs kiyā?*

Unhoñ ne sochā tak nahīn ki yih kām Ġhalat hai.
Wuh samajhte haiñ ki jo zyādā tāqat dikhāe wuhī
haq meñ hai.

► *Kyā wuh kalām se wāqif nahīn the? Kyā un ko nahīn patā thā ki mandī kā yih intazām ḡhalat hai?*

Zarūr. Wuh pāk nawishton se wāqif the. Lekin is duniyā meñ kaun pūchhtā hai ki kyā ḡhalat aur kyā sahī hai? Har ek apne nafā aur fāyde ke pīchhe lagā rahtā hai. Aise log kisī kī bāt sirf is sūrat meñ mānte haiñ ki wuh un se zyādā zabardast ho.

Isī lie wuh iḡhtiyār kā sawāl chheṛte haiñ. Kahte haiñ ki koī ilāhī nishān dikhāo jis se patā chale ki tum zyādā tāqatwar aur zabardast ho.

Insān Maqdis ko Pāk Nahīn Rakh Saktā

► *Ḳhudāwand kyā jawāb detā hai? Kyā wuh koī shāndār mojizā dikhātā hai?*

Nahīn. Wuh ek pahelī pesh kartā hai: “Is maqdis ko dhā do to main ise tīn din ke andar dubārā tāmīr kar dūngā.”

Pūchhne wāle chaunk uṭhe. Wuh bole, “Baitul-muqaddas ko tāmīr karne meñ 46 sāl lag gae the aur āp ise tīn din meñ tāmīr karnā chāhte haiñ?”

Baitul-muqaddas itnī mehnat se taiyār ho gayā hai, aur ab bhī tāmīr kā kām jāri hai. Yih kis tarah ho saktā hai ki āp use tīn din mein tāmīr kar sakein?

Lekin Ḳhudāwand Īsā kuchh aur kahnā chāhtā hai. Pahle, insān maqdis kā yih intazām pāk rakhne mein fail hai. Yih is mandī se zāhir ho rahā hai. Islie jald hī ek waqt āegā jab use dhā diyā jāegā. Aur kuchh sālon bād aisā hī huā. Romiyon ne is shāndār maqām kā satyānās kiyā.

Is se Ḳhudā zāhir karegā ki insān use pāk nahīn rakh saktā. Insān apnī koshishon se Ḳhudā tak nahīn pahunch saktā. Is ke lie yih duniyāwī maqdis kāfī nahīn hai.

Lekin Yahūdī ek aur maqdis bhī dhā denge: al-Masīh ko jo Ḳhudā tak kā sachchā rāstā hai. Wuh use rad karke salīb par chaṛhāenge.

Masīh hī Sachchā Maqdis aur Lelā Hai

Lekin yih dūsrā maqdis qabr mein nahīn rahegā balki jī uṭhegā. Aur yih ilāhī maqdis insān kā apne sāth rishtā qāym karegā. Jis kām mein insān khud

fail thā use wuh ḵhud saranjām degā. Wuhī jo sachchā maqdis hai. Jo qurbānī kā sachchā lelā hai. Jo hamārī ḵhātir muā aur jī uṭhā. Jis se hameñ apne gunāhoñ se najāt milī hai.

Baitul-muqaddas ko ḍhā diyā gayā aur āj tak nae sire se tāmīr nahīñ huā. Lekin Masīh jī uṭhā. Wuh ek pāk aur abadī maqdis hai jis ke wasīle se ham Ḵhudā ke huzūr ā sakte haiñ. Jis se ham us ke farzand ban sakte haiñ. Aur yih maqdis kisī maqām par mahdūd nahīñ rahtā. Ham har jagah is maqdis ke zariye Ḵhudā se rābtā kar sakte haiñ. Har jagah ham Ḵhudā kī pāk parastish kar sakte haiñ.

► *Āpkā kyā maqdis hai? Ḵhudā tak pahuñchne kā āpkā kyā pāk rāstā hai? Kyā āp duniyā kī kisī dīnī mandī meñ uljhe hue haiñ? Yā Masīh āpkā sachchā maqdis hai?*

Injil, Yūhannā 2:13-22

Jab Yahūdī Īd-e-Fasah qarīb ā gaī to Īsā Yarūshalam chalā gayā. Baitul-muqaddas meñ jākar us ne dekhā ki kaī log us meñ gāy-bail, bheṛeñ aur kabūtar bech rahe haiñ. Dūsre mez par baiṭhe ḡhairmulkī sikke Baitul-muqaddas ke sikkoñ meñ badal rahe haiñ.

Phir Īsā ne rassiyoñ kā koṛā banākar sab ko Baitul-muqaddas se nikāl diyā. Us ne bheṛoñ aur gāy-bailoñ ko bāhar hāñk diyā, paise badalne wāloñ ke sikke bikher die aur un kī mezeñ ulaṭ dīñ. Kabūtar bechne wāloñ ko us ne kahā, “Ise le jāo. Mere Bāp ke ghar ko mañḍī meñ mat badlo.”

Yih dekhkar Īsā ke shāgirdoñ ko kalām-e-muqaddas kā yih hawālā yād āyā ki “Tere ghar kī ḡhairat mujhe khā jāegī.”

Yahūdiyoñ ne jawāb meñ pūchhā, “Āp hameñ kyā ilāhī nishān dikhā sakte haiñ tāki

hameñ yaqīn āe ki āpko yih karne kā iḡhtiyār hai?”

Īsā ne jawāb diyā, “is maqdis ko ḡhā do to main ise tīn din ke andar dubārā tāmīr kar dūngā.”

Yahūdiyoñ ne kahā, “Baitul-muqaddas ko tāmīr karne meñ 46 sāl lag gae the aur āp ise tīn din meñ tāmīr karnā chāhte haiñ?”

Lekin jab Īsā ne “Is maqdis” ke alfāz istemāl kie to iskā matlab uskā apnā badan thā. Us ke murdoñ meñ se jī uṡhne ke bād us ke shāgirdoñ ko uskī yih bāt yād āī. Phir wuh kalām-e-muqaddas aur un bātoñ par imān lāe jo Īsā ne kī thīn.